



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

**Trump-i Ukraine nem senjang
kata magütsütsü: Hungary PM**

VOL. XXI ISSUE NO. 149 (ADOK 149) DIMAPUR SANGTENNÜ (TUESDAY) METSÜREMI (MARCH) 12, 2024 ₹ 5.00

Dimapur nung Integrated Business Hub and Innovation Center lapokogo

Dimapur, March 11, 2024 Nagaland rongsenketzung (DIPR): Chief Minister jenjang ajungkettsü.

Neiphiu Rio den NITI Aayog Vice Chairman Suman Bery den pa kinungtsü aser teshimtet nübo aru aser parnok adenba ajanga Centre sorkari linük nung innovation & economic development ajungkettsü mapa balala inyakba kuli agütsür.

Vice Chairman Suman Bery i Kohima semdangtsü aser War Cemetery nung tetushi agütsütsü. Paisa Aspirational Districts ka nungi nisungtem ajurutepa sensaksemtsü aser idangi NITI Aayog ajanga linük renloka aitsü asoshi tenangzükba agia mapa inyakba nenshitsu.

Dimapur nung IBH&IC lapokba ya innovation & enterprise tesem ka akümtsü alizüng atongba ka lir. IBH&IC ajanga startups, entrepreneurs aser businesses yaritsü aser

Naga nunger ka Lieutenant kümogo



Dimapur, March 11, 2024 (TYO): Niuland kübok Vihokhu nunger Kakishe Yephtho'er jabaso Hinoto Kakishe Yephthomi Indian Army nung Lieutenant ama anikogo.

March 9, 2024 nü Officer's Training Academy, Chennai nung Hinoto commission asüba sentong agia liasü.

Sainik School Punglwa nungi Cadet Hinoto Kakishe Yephthomi (Adm No. 368)-i Lieutenant anguba atema kanga nüma atanger PRO & Spokesperson, Ministry of Defence, Manipur, Nagaland & Southern Arunachal Pradesh-i sangdong ka nung metedaktsü.

Cadet Hinoto-i bendanga agütsüba aser kanga merangbaji tangar asoshi tatishitsü tajung lir. Pa Sainik School Punglwa nung züngsem akümba ajanga school-i lennirtem aniteta kuli agütsür. tashi tanga cadet ka nungi commissioned officer ka akümba ajanga asenok ajak ajungmesor, ta paisa metedaktsü.

Küm 4 sülen Citizenship Amendment Act mapa tenzüker



New Delhi, March 11, 2024

(Agencies): Centre sorkari March 11, 2024 nü Citizenship Amendment Act (CAA) indang sangdong ka agütsügo aser 2024 Lok Sabha election matongdang mapa tenzüksü.

CAA ajanga India senso akümtsü atema tamangba yimsü mezüng atema amshir aser iba ajanga tamangba yimsü tsütsü nübo agi memeneptem timtem ajurutsü ta tsübur.

Nübor temi CAA anema lungkak aitaka December 2019 nung Parliament nung agizük. Linük kübok tesem balala nung CAA anema lungkak aitdang nisung 100 tema taküm sama.

Centre-i sangdong agüja sülen December 31, 2014 matongdang Bangladesh, Pakistan aser Afghanistan nungi India-i aruba non-Muslim nunger nem India senso agütsütsü.

Senso angutsupurtemi online mode ajanga applications agütsütsü akok. Tenüng agütsürem dang documentation kecha memeshitsü, ta Home Ministry otongdar kati ashi.

2019 election matongdang BJP-i CAA mapa tenzüksü nangzüka liasü. Home Minister Amit Shah-i CAA ya linük indang ozüng ka lir aser Lok Sabha election matongdang kobi melii sangdongtsü ta ashiba sülen tanü sangdongogo.

West Bengal Chief Minister Mamata Banerjee-i CAA anema kanga tekong meranga noktaka arur aser iba atema Union Home Minister-i la aitsü.

December 2019 nung Parliament nung CAA agizükba sülen Assam nung lungkak aitba tulutem agia liasü aser iba nung ajemdaker sorkari security

Tanü Mamata Banerjee-i kanga dang aritepa osangbenertem jaoka senden ka amendang lar sorkari nübor temi anema yangluba ozüng magizüksü ta nenshia metedaktsü.

"Nisung bendanga amshira onoki magizüksü. Tamangba yimsü, kin mesüra oshi süang onoki bendanga amshiba inyakym magizüksü. Parnoki nisung ka nem anogo ana nung senso magütsütsü" ta Mamata-i ashi.

"Küm pezü tsüngda aiben atsüla nüba aruba sülen election agütsü osang metedaktsütsü anogo ana asem ka lia mapa inyaktsü tenzükba ajanga iba ya yimtenren maparen atema yangluba kuli agütsür" ta laisa ashi.

CAA, NRC aser National Population Register (NPR) ya West Bengal aser northeast atema tebilemtsü onüktem lir aser election matongdang tensa sünjema dang linür ta Mamata-i ashi.

"Elections tonga arudang BJP-i maneni CAA onük bener

Assam ajungalen security akangshir

Guwahati, March 11, 2024

(Agencies): Centre sorkari Citizenship Amendment Act (CAA) mapa tenzükba sülen Assam ajungalen security akangshiro.

Guwahati yimti nung sepai aika tesem balala nung mapa lemzükja lir.

Külen, Assam nung Raijor Dal, All Assam Students Union (AASU), AJYCP, AJP aser

Congress dena political aser non-political teloktemi CAA

magizükba aser lungkak aitsü metedaktsü.

aruogo, saka ni taküm ali tashi parnok nem iba nungi tajangzük magidaktsütsü" ta laisa shisem.

Tamil Nadu Chief Minister MK Stalin-ia BJP sorkari loktiliba nung mangattep adoktsü mapa inyaker ta aitsüogo. Paisa iba ozüng mebenoktsü nangzükogo.

Kerala, Punjab, Rajasthan aser Chhattisgarh nunga CAA anema bangzüngtem renema lir.

Narendra Modi sorkari mapang meshitak ka nung ashishitep aketba CAA rules sangdongba atema Congress-i aitsüogo.

Lok Sabha election agütsü mapang nung iba sangdong agütsüba ya election nung nübo bidentsü atema lir aser ibaji talisa West Bengal aser Assam nung lir ta Hombarnü Congress-i metedaktsü.

"December 2019 nung Parliament ajanga agizükba Citizenship Amendment Act rules sangdongtsü atema Modi sorkari küm pezü aser ita asem agiogo" ta Congress lennir Jairam Ramesh-i ashi.

"CAA rules sangdongtsü atema extensions 9 tashi meshiba sülen elections jakdang mapa tenzükba ya elections nung nübo ayimtsüba atema lir" ta pai ashi.

"CAA mapa tenzükba ajanga PM Modi-i tenangzükba ka asangdang kümtsüogo aser asen Constitution yanglurtemi nangzükba ataloktsüogo" ta tanü Union Home Minister Amit Shah-i ashi.

ENSF-i tanü rongdak Federal Assembly jateper

Dimapur, March 11, 2024

(TYO): Eastern Naga Students' Federation (ENSF)-i March 12, 2024 nü Emergency 24th Federal Assembly ayongba metedaktsü.

Asüngnep 11:00 ako nungi ENSF Office, Tuensang HQ nung iba senden amentsü.

"Senden nung ENPO-i ENSF aser Federating Units dangi shidi züliba lemsateptsü. Frontier Nagaland Territory takhangba atema Public Emergency ketdangsütsü mapa nungloktsüba atema jembitsü" ta ENSF Speaker Pho-e Konyak aser Assembly

Secretary L. Kiukhum nati ashi.

Federating units 7 aser Eastern Nagaland Sumi Students' Union (ENSSU) nungi Speaker/Chairman, President, General Secretary, executives anana aser ENSF Advisory Board senden nung adentsü metedaktsü.

ENSF nung federating units 7 ji Chang Wedoshi Setshang, Konyak Students' Union, Phom Students' Conference, United Sangtam Students' Conference, Yimkhiung Akherü Arihako, Tikhir Students' Union aser Khamniungan Students' Union

lir.

India sorkar dang Frontier Nagaland Territory tentetsü rongshitsü atema Eastern Nagaland People's Organisation (ENPO)-i Eastern Nagaland region ajunga mokdanger.

March 12, 2024 nunga Tuensang, Mon, Longleng, Kiphire, Noklak aser Shamator district ajak mokdangtsü ajisüaka iba mokdang kübok tatifang agütsüba kaketshirtem, Power Department, Media houses, Medical emergencies, Fire & Emergency services aser kiyir benjungtem madentsü ta metedaktsü.

Mokokchung nung political party ajunga den senden amen



Political party ajunga den Deputy Commissioner, Mokokchung indang Conference Hall nung March 11, 2024 nü District level senden ka amenba mapang Deputy Commissioner & District Election Officer, Mokokchung, Thsuvisie Phoji-i jembidang tangokba noksa nung angur.

Dimapur, Metsüremi/March 11 (TYO):

18th Lok Sabha Election, 2024 dak sendakba nung political pary ajunga den District level senden ka March 11, 2024 nü Deputy Commissioner, Mokokchung indang Conference Hall nung mena liasü.

Iba senden ya Deputy Commissioner aser District Election Officer, Mokokchung, Thsuvisie Phoji lenisuba kubok mena liasü.

Pai iba senden nung adener ajunga dang aruya aliba election asoshi renemshitsü ayongzük aser political party ajunga

tsüngta amalitep tali akatsü ajungmeso.

Election agitsü anogo sangdongba sülen Model Code of Conduct (MCC) benoktsü, anungji political party ajungai election tajungtiba nung agitetsü mechii MCC nung shia aliba ama anidaktsü ayongzuka liasü.

Mokokchung aser Niuland DPDB senden ayonger

Dimapur, Metsüremi/March 11 (TYO):

Deputy Commissioner & Vice-Chairman, District Planning and Development Board (DPDB), Mokokchung, Thsuvisie Phoji-i sangdong ka nung March ita atema DPDB senden ya March 15, 2024 anüngdang 11:00 ako nungi Deputy Commissioner, Mokokchung indang

Conference Hall nung amentsü, ta metedaktsü.

Iba senden nung Board züngsem ajak medema arua adentsü ayongzüker, ta sangdong ajangasa ashi.

Maneni Deputy Commissioner & Vice-Chairman, District Planning & Development Board, Niuland, Mokokchung indang Sara S. Jamir, NCS ajanga

sangdong ka nung Niuland indang DPDB senden March ita asoshi March 15, 2024 anüngdang 11:00 ako nungi Deputy Commissioner, Niuland indang Conference Hall nung amentsü, ta metedaktsü.

Anungji iba senden nung züngsem ajak medema adentsü ayongzüker, ta sangdong ajangasa ashi.

Dimapur nung tetsür lenirtem asoshi training agütsü



National Clean Air Programme kubok March 11, 2024 nü Lotha Hoho Ki, Dimapur nung tetsür lenirtem asoshi training cum skill development sentong ayongzuka nung tetsür lenirtem nem waste dustbin lema agütsü.

Dimapur, Metsüremi/March 11 (TYO):

Dimapur nung tetsür lenirtem asoshi training cum skill development sentong ka National Clean Air Programme

kubok District Administration

ajanga March 11, 2024 nü

ayongzuka liasü.

Imlijungla Lemtur, EAC Dimapur ajanga sentong nung adener pela agizükba o jembiba mapang, Nagaland nung air quality standards matongba yimi ana nung Dimapur ya ka lir aser kum pongu tashi Dimapur ya national average dang tajemba arur, ta ashi.

Mopung menenba kuli aika rongnung jana rongdokba ya ka lir, anungji mopung menenba ajemtsü asoshi waste management technique tajung amshitsü nüngdaker, ta lai ashi.

Dimapur Municipal Council

indang Administrator, Manpui Phom, NCS ajanga jembidang nüburtem aser kibong sasep nung mera agitsü tongtipang ta ashi.

Duncan aser Reverbelt colony tem nung ki tonga jana bendenba pilot project tenzükogo aser yangji gari tila tem anogo nung asemen-peziuben jana bendena lemsar indoker, ta pai ashi.

Jana ketdangtsuba tebilemtsü azüoktsü atema nüburtem aser kibong shiai shilem agitsü nüngdaker, ta pai nenshia ashi.

Technical Session mapang Olivi G Chophy, Senior Scientific Assistant, Nagaland Pollution Control Board (NPCB) ajanga tetsür lenirtem dang iba training nung angazükba shisatsü amshia pei

dang masü saka kibong nung züngsem ajak dang mopung menenba azüoktsü sayutsü ayongzuka liasü.

Kasa sentong nung Team PRO RURAL ajanga Waste Management Techniques sayua liasü. India nung anogoshi jana metric tonne lakh 1.6 adoker aser alima nung jana ya 2050 kum tashinung 3.40 billion tonnes akumtsü asadangteta lir, ta pai ashi.

Morung Express ajanga February 25, 2022 nü asadangba nung Dimapur aser Chümoukedima lungjemer anogoshi jana metric tonne 115 adoker, ta shia lir. Item ya shilem 70 bo bendena trenching ground nung indokba lir aser shilem 30 shi kilentü aoba, lanes, ayong aser kinük-kisang nung bendena lir.

Lok Sabha Election 2024 nung NPF-i Dr Chumben Murry yaritsü

Dimapur, Metsüremi/March 11 (TYO):

Naga People's Front (NPF) indang Working Committee senden ka March 11, 2024 nü Central Office, Kohima nung mena liasü.

Indo-Naga yimten ken o tekeratiba nung ajaki akumtsübotsü aser agizüktetsü tatem kati bener aruba nung tongti shilem agitsü nükkidong nung tang Opposition maliba sorkar kumteta aliba tangatetba nung Lok Sabha Election 2024 nung NDPP candidate Dr. Chumben Murry yaritsü NPF Working Committee ajanga iba senden nung telemtetba agia liasü.

CANSSEA Dimapur Unit menden melentepogo



Dimapur, Metsüremi/March 11 (TYO):

Confederation of All Nagaland State Services Employees' Association (CANSSEA) Dimapur Unit nung tejenba aser tasenba ketdangpur menden melentepo sentong ka March 11, 2024 nü Directorate of Food & Civil Supplies, Dimapur indang VC room nung agia liasü.

Iba sentong nung CANSSEA Dimapur Unit tir tejenba Arongba Aier ajanga CANSSEA Dimapur Unit-i tesüiba kum tenet nung inyakyonga aruba indang osang tongmelang agi lemsatepa liasü.

Paisa Joint Director, F&CS, I.

DPRO Kohima nung tepila sentong ka agi



Dimapur, Metsüremi/March 11 (TYO):

DPRO Kohima, Ruopfulenuo H. Mepfhuo nem akum agüja tepila sentong ka March 11, 2024 nü Office of the District Public Relations Officer Kohima ajanga office telungzük nung ayongzuka liasü.

DPRO Kohima mapa yutsür Ruopfulenuo H. Mepfhuo-i iba sentong nung o tatsüka jembidang DPRO Kohima tejenbai bendanga agütsür mapa inyaka department tenüng temaba jenjangi ajungketba asoshi tenüng sang agüja liasü.

Paisa mapa tasenba kilemi inyaktsü teimla aliba lemsatep aser külem staff tem dang yariteptsü aser amalitep akatsü ayongzuka liasü.

Maneni IA Kohima, V. Khekiye Sema; IA Jakham, Shalong aser Office UDA, Chumbeno Ngullie nungeria iba sentong nung o tatsütsü jembia liasü.

SBI-i electoral bonds atemama pang meshisem saka SC-i magizük



New Delhi, March 11, 2024: Hombarnü New Delhi nung Supreme Court nung Chief Justice of India, D.Y. Chandrachud leniba nung judge pongui akümbera bench kati SBI-i Electoral Bonds sangdongtsü atema mapang meshisemba ken o angadangba mapang tangokba noksa nung angur. Ajisüaka Supreme Court-i SBI-i mepishibaji magizük.

New Delhi, Metsüremi/ March 11 (Agencies): State Bank of India (SBI)-i electoral bond osang sangdongtsü atema Supreme Court dang mapang meshisem, saka SC-i temepishibaji magizuki Mongolbar- March 12 tashi nungbosa sangdongang, ta tuyuogo.

Ajisüaka Supreme Court bench-i, "Bank teinyaktsü ajak agi 'sealed cover' ji lapoka osang bendenba sülen Election commission nem agütsüba dang. Tesüiba anogo 26 tsüngda kechi inyaka liasü?" ta metedaktsü.

SBI-i mepishibaji magizuki Chief Justice DY Chandrachud-i aniba Supreme Court bench-i Election Commission of India (ECI) danga bank-i nenok nem agütsüba osangji March 15 nü nikongdang 5:00 ako tashi

Taoba ita tomten Supreme Court-i, electoral bond scheme ya linük temzung nung aliba pei tebilemba sadema jembiba aser information temeden anema lir, ta shia iba scheme agienja liasü. Iba mapang nungji SC-i SBI dang küm 6 scheme ya ajanga yimtenren party temi sen kwi agizük aser tenla agütsürtem tenüng EC nem metedakjang, ta tuyua liasü.

Chief Justice, D Y Chandrachud leniba nung judge pongui akümbera Constitution bench jagisa March 6, 2024 anogo tashi nung yimtenren party temi agizükba electoral bond osang tejangja EC nem metedakjang ta tuyua aser EC danga March 13 tashi nungbosa parnok indang official website nung SBI-i agütsüba osangji metedakjang, ta tuyua liasü.

EC ana shimtsü atema March 15 nü PM-i aniba luden senden amentsü

New Delhi, Metsüremi/ March 11 (Agencies): Election Commissioner of India nung züngsem asem lir, ajisüaka Election Commissioner, Arun Goel-i ajungbena menden toktsüba sülen menden tazüng ana aliba atema nübo shimtsü asoshi Ato kilonser, Narendra Modi-i March 15 nü senden ka ayongzüka amentsü, ta osang angazüker.

Lok Sabha election agitsü anogotem sangdongtsü atema anogo ishika dang lia Honibarnü Goel-i EC menden nungi anen; pa kümsükji December 5, 2027 tashi liasü aser sangküm February ita nungbo pa Chief Election Commissioner (CEC) akümtsü liasü.

Chief Election Commissioner aser Election Commissioners shimba committee nung züngsemtemji Ato kilonser, Union Minister ka aser Lok Sabha nung Congress lenir lir.

Par asemi election tenüng pongungu renemtsü; iba

commissioner menden ana tazüng aliba atema nübo shimtsü. February 14 nü Election Commissioner Anup Chandra Pandey arrshi küm 65 abensaba sülen pai mapa nungi anisüngzüka liasü aser Honibar aonung Arun Geol-i ajungbena Election Commissioner menden nungi anen.

Ato kilonseri aniba committee-i tenüngtem benokba nung ajemdaker linük Tiri election commissioners shimtsü. Pandey melen nübo ka shimtsü atema March 7 nü senden ayongzüka liasü saka sendenji thinener lia Goel-i ajungbena menden toktsüba ajanga Election Commission nung Chief Election Commissioner, Rajiv Kumar dang anüngogo.

Union Law Minister Arjun Ram Meghwal kubok search committee kati EC menden tazüng ana atemaji 'list' ana nung tenüng pongungu renemtsü; iba

Molungnen Ø



I. Satemmenla
(12 Dec.1958 - 07 March, 2024)

Asür I.Satemmenla (Retd. Addl. Director, School Education), Wb.Meyisosang Ozüküm (Mongsenyimti) kinungtsü shiranga alidang aser la iba lima nungi pilar onok mangyim jashi nung alidang shirnokisa onok dang meima sarasadem, rongsen aser nübo agi yaritepogo, nenok ajak dang ozü kinungertemi kanga pelaba metedaktsür.

Nenoki onok timtem tejashi mapang onok mulung süneptsüsa inyakba mapa tajungtem asoshi pelaba Mulungnen o ka nenok den yangi lemsateper. Tsüngremi nenok temeim mapatem meypa moajangma.

- Temeim Kinungbo, Chirnur & Semchirtem,
Kinunger & Adianutem.

Molungnen Ø



Lt. Emkong Tonger
(21:08:1965 - 04:03:2024.)

Asür Emkong Tonger shiranga aliba mapang nungi pa akümlı mapa temer pei tetsü taso yimkong nung oagi rema yutsüba maparen ajak nung onok dak malangba temeim mapatem agi yariteperem ajak dang onoki kanga pelaba metedaktsür. Onok timtem shisabolu tia nung alidang kija-kibong, arogo, lokti tentet aser yimten balala nungi sarasadem, nübo, rongsen aser ano tsüngdong arua yaritepba temeim mapatem agi onok mulung kanga anisüngzükogo. Onoki nenok nisung shia tenüngteta pelaba meshisemetba atema kanga sasar, ajisüaka Tsüngremi nenok ajak talubosa moajangma ta onoki sarasademtsür.

- Temeim Kinungtsü, jala-jabasotem & Kinungertem



March 11, 2024 nü New Delhi nung Congress Tir, Mallkarjun Kharge-i Churu nungi MP, Rahul Kaswan party nung agizükang tangokba noksa nung angur. Amongnū Kaswan-i BJP tokja liasü.



TIR YIMYIM

YIMOBILEM (EDITORIAL)

DIMAPUR SANGTENNÜ, MARCH (METSÜREMI) 12, 2024

Eastern pur atema langkabo ashitsüla

Nagaland anüdoklen aliba Naga kintemi joko Nagaland kübok melii parnoka parnok state balaka ser aotsü tejangraba nung centre government den jembir mapang kenpiga arur, ajisüaka tang tashi center government nungi telangzüba manguba agi tejashi sayua yakanü nungi Mon, Tuensang, Longleng, Kiphire, Noklak aser Shamator district-tem nungbo Deputy Comissioner office nungi shir government office kata melapokdaktsür aser government garia kata mesenzüdaktsü mokdanga lir. Atangji, iba lagi center government nung alirtem timatemer masü saka Eastern Nagaland nung inyaker government ketdangsertem aser nübortemang timatemer. Aji oda, ibai peisasa pei timtem aser takoksa ajurutsü inyakba mapa ka lir, ajisüaka center government-i nangzükba ama meinyakba anema tashiyim medeni tejashi sayutsübaji tanga lenmang aikabo madoker. Atangji, Nagaland anüdoklen alir Naga kintemi Frontier Nagaland ta ser state balaka asütsü meshiba jenjang nungi terabo asepzüka alur Territorial Council jenjang amaika agizüktettsü asü magizüktettsüar ashitsü makok saka center government-ibo autonomous council-ang agütsünüa tebilemba kabu yoker südi. Ashiko, iba tebilembaji center government-i Chief minister ajanga yok südi. Iba oraji ka tawa Nagaland tatar senden amendang Chief minister-bai shisemogo. Naga nungertemi jungjunga biledangra, tang aliba Nagaland state kübok ya Naga kintem ajakbo amsema mali. Shitakba Naga nunger lima tajungjibo Myanmar, Arunachal, Manipur aser Assam nungang lir. Item ajakji amsema Nagaland shitakba yanglutsü nükla nung Nagaland akümeremibö Center government den Nagaland state akümba tangatettep ken o 16 renemba rongnung tongtibang onük ka densema renema lir. Iba onük nungji ajemdaker mapa kuma aotsü atema tebang o kisüng asüyonga Nagaland tatar senden nung Naga nunger lushi ajak Nagaland state kübok ka kuma longjemtsü asoshi pungoben tashi bangzung renema lir. Ibaji kodang shisadangdir, tang aliba Nagaland state nungi ano balaka razüka aotsübaji shitakba Naga nunger taginüba aser tejangrabobo masü. Ajisüaka, melinüseti külemi alitsübaji tasak, anungji iba nisunger tebilemtsüji ajaki angatettsüla. Aji oda, asenoki India kübok meliner saka kangshia lidaktsüba ama Nagaland nungbo Naga kin sota ayutsübaji tasak asütsü. Iba ama tensa tia ka nung Nagaland anüdoklen alir Naga kintem tejangraba aser taginüba ataloktsü atema tanüngba Naga kintem ya riteptsüla. Item teyariteper kintem rongnung, talisa, Ao kini shilem tajung agitsü imlar. Tang Nagaland anüdoklen alir kintemi aruya aliba Lok sabha election nung shilem magitsü ta sangdongogo. Atangji, ibaji tang mezüng masü, tamalena election aruba mapang kasa telemtetba agir sangdongba angashiogo saka mapa kuma mangu. Ashiko, iba lagi balaka Eastern Nagaland purtemi akangba ken o ya center government-i süoki ia magir asütsüa akok. Iba ama tensa mapang ka, ENPO aser center government na tsüngda tangatettep kati maruteti Eastern Nagaland nung alirtem timatemba mapang, parnok asoshi tetsüngdai ia jembitsür telok kar nüngdaka reprangteter aser iba telokji asenok asütsüla. Ibai külen India government aser Külen ENPO ta ser tareni marutet timatemba mapang lir. Iba lagi Eastern Nagaland nungbo state government mali amai kümogo. Iba ama tensaji asenok jakdang atalokdang, asenok terepranger dang mesüi asenoksasa asenoki iba khuret ya benloker parnok tenüng nung center government den jembitsü asenok dak temulungtetba aser tangatetba shisatsü alitsüla.

OLEMSABANG

"La züngokang"

Onük Jembir : Mr. Bendang Imsong
March 8, 2024

International women's day ya kong aser kota tenzük ta shisadangra, 20th century mapang, North America aser Europe lima nung alir Tetsürtemi mapa inyaksangshi nung shilem agitsü, election nung vote agutsütettsü aser lokti den kasa shilem agitettssü asoshi tasü ita khanga tenzuka apuso. Iba takangba nung kanga tonptipang nisung watsü Clara Zetkin, Germantsür social activist, lai international women's day amongtsü shisatet. 1908 Feb. 28 anogo, United States of America nung socialist party ajanga sentong ayongzüka mezüngbuba international women's day sentong among. Iba indang osang tangalima ayimsünga perokshia ao. March 8, 1911 küm, tetsür aser tebur million aika longjemer , Austria , Denmark, Germany aser Switzerland nung ah longkak aita iba asoshi khanga nokdak. Tesülen 8th March 1975 Kum nungi, United Nations ajanga international women's day anogo ya amongtsü tenzük.

Akidang nungi alima nung tebur lenisuba nung dang anir aru. Alima otsu kaket nung teburtemi inyakba mapatem tang tongtipang ama inyakba angur. Anungji tetsur lenisutsu shilem aiben mangu, ibaji tang masu parnok maongka yimli tebur ama mongui aru. Saka Laishiba nunga suang alima otsu nunga suang koba mapang nung tetsur lenisutsu shilem ngudir parnoki alia oa tajungba inyakba angur.

Tsüngremi mezüng nisung Adam aser Eva yanglu aser Eden tsüki nung toktsü. Laishir kari ashiba agi Tsüngremi tatemsa yanglubajisa tajungba, anungji alima nung tatemsa yanglubaji meimchirtem ya lir. Ano nisung rongnung tetsürjisa tatemsa yanglu. Anungji tetsürjisa Tsüngremi yangluba rongnung tajungtiba lir. Tsüngremi tetsür nem sempet balaka aguja lir. Mojingi ibaji meteta pai Adam tama tendangra Evala makoktsü mesüra medentangtetsü, saka Evala tama tentangra lai Adambo mela-mela tsükdaiksütetsü ta metet. Anungji mojingi Evala tama tendang. Nenok tetsürtem ajak Evala ama kaka lir aser nenok nem Tsüngremi sempet tajungtiba kaka aguja lir. Anungji iba sempetji nenoki amshitetra alima nung temelenshi tulu nenoki bener arutettsü. Alimai nenok züngokdaktsutsü Tsüngremi sempet tajungtiba kaka aguja lir. Anungji iba sempetji nenoki amshitetra alima nung temelenshi tulu nenoki bener arutettsü onok teburtemi nenok dak nungi yimlar.

Tanü iba anogo nüngtem nung asenoki tetsür nüngtoko ter nem tetushi aguja parnok takum tatishtitsu tajung nunqi asenok anqazuktsu asoshi yamai lemsateper;

- takam tatisitsa tajung nungi aserok angazuktsa asoshi yamar temisateper,

 1. BC 1043 mapang Israeltsür mezüngbuba O bendanger (judge) la tenüngji Debora liasü (Obendanger 4:4-5).
 2. Esther la tasütait tamang sarasadem tulu ajanga Yihuda neburtem kümzük (Esther 8:1 nungi tatem tashi).
 3. Laishiba nungi shisa takatiba aser tesangra tetsur Yokebed Mosa tetsu, la shisa akaba ajanga Israel nunger Ijep lima alar tia nungi aneteta tenangzukba Kanan lima tongtet. (Lai Anitet 2:1nungi 8)
 4. Helene de pourtales, 1900 Kum Summer olympics, Rong aniba (sailing) nung, tetsür rongnung mezüngbuba Gold medalist. 19thcentury mapang nungi La ama asayar tajung takok tulu ngutetbaajanga tanü lanur asaya tsülen tali ajungmesor.
 5. Sweden nungi Great Thunberg, environmental activist ka. La ajanga "Fridays for future" nüngja, school strike movement tenzük .Parnok ama nisungtem ajanga asenoki alima merüka ayutsü angazüker aser tang asen lima nunga Govt.\NGO ajanga sentong balala inyaka otar.
 6. Indira Gandhi, alima nung 1966 küm mezüngbuba tetsür Prime Minister, shiba ajanga tetsürtem asoshi akümdong tajung aser Indian political system nung temelensi tajung bena arutsü.
Sonia Gandhi, Sushma Swaraj, Brinda Karat aser Mayawati nunger ama political tanishirtem ajanga tanü 33% women Reservation Bill mapa kumogo.
 7. Rano M. Shaiza 1977 küm asen Nagaland nungi Indian parliament nung mezüngbuba tetsür Lok sabha member ka liasü.
 8. Nagatsür aser Naga nunger rongnung mezüngbuba UPSC member (2013-2017) Dr. P. Kilemsüngla. La ya Educationist ka aser Padma Shri Award angur rongnung la ah ka lir.
 9. Miss Jane Roseline Ph.D Yimchungtsur mezungbuba nagatsur rongnungi Ph.D[Mathematics]nung takok angu.
 10. Rev. Dr. Noksangchila shibai Northeast India nung mezüngbuba tetsürtem rongnungi 1992 küm ABAM ajanga ordained angu aser lai meranga inyakba ajanga tanü tashi nung ABAM küpok tetsür 22 ordain süa lir. Parnok ama otsü ajanga tarutsü neburtem nem taiungshiba maneni agutsür.

Asen Naga nunger, talisa asen Aor sobaliba, yimten yimli aser senmang nung tetsürtem nem yimli magütsüba asenoki angur. Saka ano shin O ka nung " Shisa taka tetsür kati kinüngbo nem korang tajung semtsür" ta jembir. Tetezü kibok nung tetsürtemi yimten yimli ajungtsü asoshi shilem tajung agiba angur. Tanü putu tebur agi amokbanger aliba lokti aser yimten ka nung tetsür tem dak aliba sempet reprangteta Arogo, lokti aser yimten nunga lenisüba menden ağütsüsü tetemsü ta nibo bilemer aser nenok tetsürtemia tasü ita shilem agitsü epok teburtemi ajongshir.

Biblical Church Modelji (BCM) ABAM kúpok Arogotemi mapa kúma inyaktsüji nenok tetsürtem dak tashi tulu lir. Tatemsá, tanübo onok teburtemia nenok tetsürtem sentoka mali, oda nenok jenjang akhi mapang dang nungi kanga tajungba kümogo, anungji nenoki onük nung "LA ZUNGOKANG" ta shia aliba ama shilem agitetsü tasü dang itshiang ta avongzüker Tsungremi tetsur aiak moajang.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeri angateta aqitsü menishir.**

Khristan lenirtemi Assam Angh ajurua tebilemtsü onük kar lemsatep



March 11, 2024 nü United Christian Forum (UCF) nungi züngsemti Assam Angh, Gulab Chand Kataria ajurua tebilemtsü onük balala lemsatepdang tangokba noksa nung angur.

March 11, 2024: Assam nung Khristantem sorkar dang Khristantem anema inyakba nokdangtsü aiben mepishia aruogo, ajisüaka sorkari telangzüba magütsüba aser tamakok anguba ajanga Khristan lenirtemi Angh ajurua kasa temepishiba agütsüogo.

March 11, 2024 nü United Christian Forum (UCF)-i Assam Angh, Gulab Chand Kataria ajurua tebilemtsü onük balala lemsatepogo.

State nung Khristantem anema inyakba tatalokbatem sorkari menokdangtetba agi Khristan lenirtemi Angh ajurutsü telemeteta agi, ta UCF Tir Jidan Aind-i metedaktsü.

Taküm February 7 nü Hindu telok kati Khristantem dang missionary school tem nung Kangki densema Khristan temaitsütem agienang, ta tetuyuba agüja anogo 15 züngzükja liasü.

Anogo 15 abensaba sülen Hindu telok jagi Khristan school tem anema inyaktsü, ta

amokmerenogo.

Assam nung Khristantem shidi ka ajanga Chief Minister Himanta Biswa Sarma dang teyari meshia liasü, ajisüaka sorkari telangzüba kecha magütsü, ta Aind-i students' council)-i sorkar metedaktsü.

February 17 nüa Assam nung bus ka nung nun ka mezüngmeshiba sülen bus nungi meindoka liasü.

March 11 nü osangbener den jembidang Aind-i, "Organization of Khristantem aser Khristantem meyong shisaliok rejutem anema inyaker. Ajisüaka sorkari ola madoker. Iba ya tejashitsüka lir," ta metedaktsü.

"Yimjak nung amokmerenba ajanga sorkari parnok pusema alitsü südi ta bilemer," ta paisa metedaktsü.

State nung Assam Healing (Prevention of Evil) Practices Bill, 2024 ozüng ajanga Khristantem sarasadem agiba sentongtem nokdangtsüa

akok, ta Khristantem bilemer.

March 2 nü Mayong subdivision kubok Jagiroad nung osangbenertem senden ka nung Hindu Yuba Chatra Parishad (Hindu youth students' council)-i sorkar dang Assam nung missionary school tem ajak shibangjang, ta takhjangba agüja liasü.

Khristan lenirtem jagi Angh dang, "Kechiba yimsü ka-Khristan yimsü anema dang inyaker. Iba ya ajanga yimsü balala amanger ajak yimjung aser tesünep nung aliba raksatsütsü," ta metedaktsü.

2021 küm May ita nung Sarma chief minister akumba sülen nungi state nung Khristantem aser Muslim nungerem anema inyakba kanga bulua ataloker.

"Angh-i onoki lemsatepbaji tenok-tenoka angaba sülen pai tekeraba nung reprangshitsü, ta shiogo. Anungji item tebilemtsü ya tekeraba nung bentetsü ta onoki teimla akar," ta Aind-isä metedaktsü.

"Tamangba yimsü ajak atema yimjung ya kanga tongtibang, aser yimjungji tashiyim ajanga kodanga mengutettsü. Tangatetba balala onoki agizüketer aser kasa nükjidong yur küleme jajar."

Catholic Arogo tenüng nung Uijeongbu diocese nung putir, Timothy Lee Eun-hyeong-i temeshi ainlen jajartemji agizükera liasü.

Iba sentongji tembangta yimjung tsüngtsüng tenetben atem; koba ajanga North Korea aser South Korea na tsüngda yimjung, taküm aser telongjem temaitsü sayur.

North Korea aser South Korea na tsüngda tesendaktep tamajungba akumba mapang nung yimsü lenirtemi longjemer

yimjung atema jembia inyaker. Yimsü lenirtem jagisa March 21 tashi agitsü aliba temeshi aini aoba nung shilem agidaktsüner, ta ayongzükogo.

Korea ya 1392 nungi 1897 küm tashi Joseon yimli kubok liasü aser 1910 küm nungi 1945 tashi Japan kubok liasü. World War II nung Japan-i tamakok anguba sülen Korea ya ana kuma lemdanga North Korea ji Soviet Union aser South Korea ji US den aden.

Korea lemdanger alibaji longjemtsü merang saka Soviet aser US na tsüngda mangatettep aliba ajanga melongjemteti Korean War (1950-53) liasü. Iba rara nung nisung million 3 shi asü aser million 1.5 jenshia liasü.

ANOGO ABEN TSÜNGREM DEN

Nenok tesangwa lir

Yamaji nisungji nenok mapa tajung ngua, kotak nung aliba nenok Tebu sentsüwangshidaktsütsü asoshi parnok madang nenok tesangwa jungkai adokdakjang. Mathi 5:16

Ammang nung tesangwai mapa inyakba nung kecha aibilen mali. Tesangwai tasü itta kecha marendaki pa aliba sayur aser ammang sushia yoker. Tsüngremi Pa tesangwa agi na sündaktsür. Na meketa aliba pur dak amang aliba na ajanga Tsüngrem sentsüwangshi agi sushidaktsütsü asoshi Tsüngremi na Pa tesangwa agi sunga lidaktsüner.

Aji süaka na meketa alimaji tammangba tammangba kumra, ammang nem tai tagütsü! Ammangi ammang mapa inyaker dang. Ammang anebtsübaji tesangwaji dang lir. Alimaji tammangba kumra tebilemtsüji ammangji masü tebilemtsüji tesangwa nung lir. Yisui Pa nütsüngtem dang ashi, "Nenok alima tesangwa lir" (Matt. 5:14). Koda tamaren mapa - Tsüngrem tesangwa ajanga ammang aridoker ka asütsüji Yisui Pa arutsü indang ashidang ashi, "Ammang nung alirtemi tesangwa tulu ka angu, aser tasür lima aser tasü akhüm nung mela alir dangi sangwa adok" (Mathi 4:16).

Alimai Yisu arutsü memeteti mali asü! Ammang sushidaktsür! Yisu aolen ajak Tsüngrem ochiba tasü itta sayu, nüburtem aneb, anemsü jungkai adok aser temenen puritok angu. Tebui kodang par chir ajanga tesangwa yok alimaji kodanga akhi ama mali asü. Ne danga yamaji shitetsü asü? Kodang Tsüngrem tesangwaji menokdangi ne taküm ajanga yaloktsüdir, ammangji sushia aotsü.

Vietnam nung Protestant Arogo ka nungi züngsem asem chiokogo

March 11, 2024: Hopta ka pastor-i metedaktsü.

tejaklen Vietnam nung police-i Osang angazükba agi, 2020 Protestant Arogo ka nungi küm Y Qui Bdap-i Hanoi nung züngsem asem apuba sülen aliba US Embassy nung ketdangsertem ajurua sorkar Amongnū chiokogo.

Khristan asemji Dak Lak province kubok Cu Kuin district nung Ede lisopurtem lir aser par asemprong recognize masuba Protestant House Church ka nung züngsem lir.

Osangbener den jembidang Pastor, Y Khen Bdap-i, "Onok kanga shisabulua liasü, kechiyong police-i onok nem osang kecha memetaktsütsü parnok apu," ta metedaktsü.

Police-i apuba Khristan asemji pastor Khen adianu, Y Qui Bdap, par jabaso Y Nam Bkrong aser pastor aianu'er jabaso Y Kic Bkrong nunger liasü. Pastor Khen adianu Qui bo sayutsüngir ka lir. Parnok ajak KUKA Home Vietnam company nung inyaker.

Pastor Khen Bdap-i, "Company executives-i ang onok dang police-i parnok apuba osangji metedakja liasü," ta ashi.

"March 6 anepdang parnok company nung mapa teinyakdak mapang nung police-i puer ao. Kuli kecha makai police-i parnok apu," ta

2017 küm Protestant Arogoji tentetba sülen police-i pa aiben jaoka asüngdangyaa liasü aser tawa pastor Khen'er kinüngertem apubajia Arogo dak sendakba lir.

Vietnam nungbo communist sorkari Protestant House Church magizüker, ibayongji iba Arogo nung züngsemtem mapang shia amokmerener.

March 8 nüa Evangelical Church of Christ of the Central Highlands nungi sayutsüngir, Y Bum Bya tepseter lia angu. Yaküm December ita nung police-i Bya apuba sülen kanga mejungi züka liasü.

Vietnam nung Khristan telok 100 shi lir saka communist sorkari Khristan telok 13 dang recognize süa lir. Iba linük nung Khristan nütsüng million 1.12 lir.

AO OSHI ANGAZÜKDAK:
TANÜ ANGAZÜKTSÜBA OJANG
**Sot**

(v) am a ata, puet (hold)

* Tsüraburtemi tanurtem moudaktsüi sot.

Sotak

(v) teka agi tangshiba, inyaktsü apusoba (cling, lay hold of, start to work)

* Samarobai tanubusang dak sotak aser iba sülen mapa nung sotak.

OLONG PAITEP # 6724

1		2		3		4	
		5		6		7	
8							
		9					
10							
11				12			
13				14			
15				16			

TIPLÉN

1. Anenzükdkak ki - (5)
 3. Asür mangyimba - (5)
 5. Temulung nung shisadang - (5)
 8. T _ _ _ lu - (3)
 10. Taktang temalen - (9)
 11. Tesa _ _ _ a - (3)
 13. Ajungbena temulungjang tongtonglatsü atu - (5)
 15. Tejen lai nung tesayur - (5)
 16. Tsüngsak-mopung - (5)

LANGTSÜNGLEN


1. Reprangdaktsü - (4)
 2. _ _ _ ur - (3)
 4. Kiojen yangludak - (6)
 6. _ _ _ ait - (7)
 7. Nagaland nung ayong ka - (5)
 9. Küm kasa purtem - (5)
 10. Tetsüng tajemetdak - (6)
 12. _ _ _ adenshi - (4)
 14. Tsünüsenbongtsü adokdak - (3)

OLONG PAITEP # 6723 TELANGZÜBA**TIPLÉN :**

1. Kasa, 6. Rangben,
 7. Mait, 9. Poktet, 11. Ati,
 13. Atasa, 16. Rür, 17. Rajang,
 20. Lanu, 24. Nüngjem,
 25. Sura.

LANGTSÜNGLEN :

1. Khu, 2. Süjak, 3. Onük,
 4. Oba, 5. Anü, 6. Ratet,
 7. Mozü, 8. Ita, 10. Tar, 12. Tinu,
 14. Salem, 15. Aja, 18. Anünü,
 19. Taju, 21. Ano, 22. Onü,
 23. Kua.

NAI-A YA METETTER MA**ALIMA NUNG BREAD TEJENTIBA**

Turkey nung archaeologist temi alima nung bread tejentiba nugutetogo. Konya province kübok Catalhoyuk tesem nung parnoki 6600 BC nung yangluba bread ngutet.

"Mekan 66" ta ajaba tesem ka nung alemli ali agi yangluba ki kati meketbanger oven structure ka nung bread residue ngutet ta Necmettin Erbakan University Science and Technology Research and Application Center (BITAM)-i metedaktsüogo.

Manipur sorkari nisung 26,000 nem Rs. 17 crore lema agütsü

**Imphal, March 11, 2024**

(Agencies): Manipur Building and Other Construction Workers Welfare Board (MBOCWWB)-i Imphal nung sentong ka ayonga agidang Manipur sorkari beneficiaries 26,000 nem Rs. 17 crore lema agütsüogo.

Chief Minister N. Biren Singh-i welfare benefits lema agütsü aser paisa Accidental Death benefits and Natural

Deaths asoshi cheques agütsü.

"Tanü labour card holders nem Rs. 17 crore shi lema agütsüogo" ta CM Biren-i ashi.

Manipur Building and Other Construction Workers Welfare Board-ia Pradhan Mantri Shram

Yogi Maan Dhan agizükogo.

Nisung 26,000 nem tajangzük

agütsütsü aser iba sentong ayongba atema Board nung staff aser employees nem tenüngsang agütsür, ta pai ashi.

Direct Benefit Transfer (DBT) ajanga labour & job card holders, financial recipients, students aser pensioners amala nem senotsü agütsür.

Iba sentong nung Minister H. Dingo, Member of Parliament (Rajya Sabha) Maharajah Leishemba Sanajaoba, MLA tem, Chief Secretary Dr Vineet Joshi, MBOCWWB Chairman K Sarat Singh aser tangartem aden.

Mizoram sorkar tesayur ka mapa nungi anentsü**Aizawl, March 11, 2024**

(Agencies): Mizoram nung class 10 board tatidang indang social science question paper temai adokba atema state sorkari tesayur ka mapa nungi anentsüogo.

March 8 nü tatidang metenziükhang iba tesayur yagi kaketshirtem nem suggestions agütsü aser Education Minister Dr Vanlalthlana-isa ashi.

Social science paper nung tasiüngdangbatem aser sorkari ketdangsüba Mizo High School tesayuri agütsüba suggestions mesüktepba agi Mizoram Board of School Education (MBSE)-i bushisüngdang tenzük, ta minister-isa ashi.

MBSE-i Mizoram

Secondary School Teachers' Association (MISSSTA)

president, Mizo High School nung class 10 kaketshir principal, kaketshir kar students aser temulung melemi bilemba tesayur dang asüngdangya

Idangji tesayur ya question papers reprangshiba moderation team nunga dena aliba metet aser pai aibelena inyakba nangzük ta Dr Vanlalthlana-isa ashi.

Pai special class ka nung kaketshir kar nem suggestions ama board exam questions agütsü aser kaketshirtem itemji notebooks nung züluoka ayu ta Vanlalthlana-isa shisem.

Bushisüngdang aodang suggested questions ji kangabo meprokshi liasü kechiyong

special class nung kaketshir kar dang adener aser Mizo High School nung class 10 kaketshir ajakibo mangu, ta paisa metedaktsü.

Tesayurji Deobarnü mapa nungi anentsüogo aser iba dak sendakba nung First Information Report (FIR) ka benokogo.

Hombarnü examination committee pur senden ka amen aser iba atema olemtep. Senden nung tanüngba subjects ajak lemteta aliba ama agitsü jembitepogo ta Education Minister Dr Vanlalthlana-isa metedaktsü.

Iba tatalokba atema kaketshirtem aser tsüraburtem jashiteper aser parnoki social media sabang balala nung tebilemba lemsateper.

**GOVERNMENT OF NAGALAND
OFFICE OF THE LABOUR COMMISSIONER**

New Capital Complex
NAGALAND: KOHIMA

No.LBR-964/84(Vol-I) //

Dated Kohima, the 8th March, 2024

RESULT DECLARATION

The Labour Commissioner, Nagaland, Kohima is pleased to declare the result of viva-voce conducted by the Department Recruitment Board from 11.12.2023 to 13.12.2023 to fill up 5(five) MTS posts in the Department with the approval of the Government vide letter No. LAB-1/6/2022-23 dated 7th March, 2024.

The selected candidates are listed as follows:-

Sl.No	Roll No	Name of the Candidate	Place of posting
1	039	Shri. Eyoketo Khizho	Assistant Labour Commissioner Office, Kohima
2	161	Shri. Nangshikaba Walling	Office of the Labour Commissioner
3	431	Smti. Moainla Jamir	Assistant Labour Commissioner Office, Dimapur
4	195	Smti. Sashikumla	Labour Welfare Centre Dimapur
5	240	Shri. Shahlem Konyak (BT)	Office of the Labour Commissioner

WAITING LIST

Sl.No	Roll No	Name of the Candidate
1	392	Shri. Mulato Aomi
2	106	Shro. Myingthungo Murry
3	282	Shri. Kevithuto Kenna-o
4	418	Shri. P Pongchi Konyak (BT)

Trump-i Ukraine nem senjang kata magütsütsü: Hungary PM

Budapest, Metsüremi/March 11 (Agencies): Donald Trump ya US tir inyaktsü tanaben shimitetra Russia-i amakba anema raraba Ukraine nem pai senotsü teyari magütsütsü, ta Hungary Ato Kilonser Viktor Orban-i ashi.

"Pai Ukraine-Russia rara nung senjang kata magütsütsü. Aser iba yongji rara atemtsü," ta conservative telok nungi ato kilonser Florida nung Trump ajuruba sülen ashi.

Taoba mapang US tir inyaka alisangi pa tir inyaktsü tanaben shimitetra ghonda 24 tsüngta rara tembangdaktsütsü nangzüka lir, saka osang tejangja magütsü.

Orban ya yimjak nung akhi mapang nungi pa tembar Trump bhukumer ka lir.

"Ukraine-i par sasa menokdaktsütsü ta ajaki meteta lir. European nunger den külemi America nungeri sen aser nok-nü magütsüra, rara ya atemtsü. Aser America nungeri sen

magütsüra, European kistüngi iba rara nung sen magütsütsü. Aser rara ya tembangtsü," ta Orban-i Hungary indang M1 TV channel dang Deobarnü ashi.

Russia-Ukraine rara komasür tatem kati arutsü, iba atema Trump sentong tejangja lir ta pai ashi. Trump-i tang tashi Orban-i jembiba nung telangzüba agijä mali.

Hokulbarnü Trump'er Mar-a-Lago kidang tena ajurutepba mapang, "Viktor Orban dang tajungba, tekundangba mesüra lenir tajungba mali. Pa ya jangratemsüla lir," ta taoba US tiri tenüng sanga liasü.

Pai US semdangba mapang US Tir Joe Biden majuru, shiba November ita tir election nung Trump den tokteptsü teimla lir.

Bendanger leniri linük semdangba mapang tang teinyakdak lenir den majurui taoba lenir ajuruba ya khenyongi yimya masü.

2022 küm February 24 nü

nungi tenzüka tashi ajak amshia Ukraine amakba sülena Hungary ato kilonseri Russia Tir Vladimir Putin den tesendaktep tajung ayuba mechii kilem EU lenirtemi pa kanga sashia aitsü.

Anüolen linüktemama masü Orban-i par kidanger Ukraine nem nok-nü agütsütsü memulunger aser Kyiv-i nuclear nok-nü aliba Russia makoktsü ta shijen ashir.

Trump ya tanaben tir kumra, US-i Ukraine nem senotsü aser mitkar tsütsü teyari agütsüba ajemtsü ta EU lenirtemi shisabolur.

Republican teloki memulungba mechii Ukraine nem sen billion \$60 mitkar teyari densema sen billion \$95 foreign aid bill ka US Congress nung tsükdaka lir.

US border security atema senotsü teyari talika ka magütsü tashi iba bill ya House of Representatives majangdaktsütsü ta Republican temi ashir.

Palestine nunger 31,045 süogo aser nisung 72,654 yiruogo, ta Hamas indang health ministry-i ashi.

Hamas telok ya Israel, United States, European Union, Britain aser tanga linüktemi kiralongrara telok ka ama agizüker lir.

Haniyeh-i, Palestine Tir Mahmoud Abbas-i aniba Fatah movement aser tanga teloktem den longjemer unity government ka tentettsü atema par telok renema lir, ta ashi.

Pai ashiba agi, iba inyakyim nung Palestinian National Council ka shimtsüba aser legislative aser Tir election magi tsüngda interim national consensus government ka tentettsüba densema lir.

2007 küm Hamas puri Gaza atsüngba sülen telok ana longjemtsü atema sensaksem takok monguteti aradar.

Ceasefire atema sensaksem toktsüba atema Hamastekolakbai Israel aitsü

Gaza, Metsüremi/March 11 (Agencies): Gaza nung rara tembangdaktsütsü atema ceasefire asoshi sensaksem bangdaka toktsüba aser hamas pur takhangba magizükba atema Hamastekolakba Ismail Haniyeh-i Deobarnü Israel aitsügo, ajisüaka par teloki tebilemtsü bentetsü atema sensaksemtsü asoshi maneni inyaktsü ta ashi.

Haniyeh-i ashiba agi, Israel-i Gaza Strip nung military inyakyim anentsü, parnok sepaitem anintsü aser tesem balala nung jenshir aliba Palestine nungertem pei kidangi meyipa odaktsütsü atema tenangzükba ka magütsü.

"Gaza nung rara manentsüsa tenangzüktepbabo meyangluner," ta Haniyeh-i ashi. "Tsükchir-i ceasefire aser onok nüburtem amakba

anentsü atema tenangzükba tejangja ka magütsür," ta pai shisem.

Haniyeh-is, par nüburtem kümzüktsü atema parnok mulungteter lir aser kasa mapang nung sensaksem ajanga mangatettep bentetsü atema lenmang ka bushitsü, ta ashi.

"Tanü ken o sensaksemerem nungi osang tejangja ka angazükra tenangzüktepbabo tembangya yanglutsü atema aser tepuoker melentepba dak sendakba nung inyakyim atsüshitsü atema onok renema lir," ta Haniyeh-i ashi.

October 7 nü Hamas puri Isreal nunger 1,200 tepsetba aser nisung 253 pua bener aoba sülen iba rara ya tenzüka liasü. Iba dak sendakba nung Israel-i meyiper Gaza amak tenzük aser Deobarnü tashi nung

Hamas telok ya Israel, United States, European Union, Britain aser tanga linüktemi kiralongrara telok ka ama agizüker lir.

Haniyeh-i, Palestine Tir Mahmoud Abbas-i aniba Fatah movement aser tanga teloktem den longjemer unity government ka tentettsü atema par telok renema lir, ta ashi.

Pai ashiba agi, iba inyakyim nung Palestinian National Council ka shimtsüba aser legislative aser Tir election magi tsüngda interim national consensus government ka tentettsüba densema lir.

2007 küm Hamas puri Gaza atsüngba sülen telok ana longjemtsü atema sensaksem takok monguteti aradar.

Indonesia tzümetüsüng aser anentsüh lendong nung asür 26 jungogo

Jakarta, Metsüremi/March 11 (Agencies): Indonesia kübok Sumatra asetkong nung tzümetüsüng aser anentsüh lendong nung asür nisung 26 jungogo.

Hombarnü sangdong ka ajanga ketdangsürtemi ano nisung 11 monguteti lir ta metedaktsüba den lendong nung asür timba akümtü ta shiogo. Tzümetüsüng asemshia aoba aser anentsüh yadokyonga aoba mapang tekümzüktemi tasümgan timba nguteta aradar.

Tzümetüsüng agi West Sumatra province nung Brehostibarnü nungi district teku metsünger lir. Hokulbarnü anentsüh tulu ka aluba sülen ayong ka nokdanga ayu aser iba sülen tzüshi tulu alua Pesisir Selatan district nung yimtsüngtem dak kongshia liasü.

Kasa mapang nung electricity maliba, aputem raksatokba aser lishi o jana balala agi lenmangtem nokdanga ayuba ajanga tekümzükba aser teyari agütsüba maparen nung tetsüdkaktsü adoker, ta National Disaster Management Agency-i Hombarnü ashi.

Otongdar Abdul Muhamadi ashiba agi, tekümzüktemi tasümgan aika ngutetogo aser talisa lendong agi tamajungtiba kongshiba Pesisir Selatan aser kidanger Padang Pariaman district nungi tasümgan timba nguteta ajak senteper asür 26 jungogo.

Anentsüh agi ki 14 anenbangogo, ta pai ashi. Iba lendong nung yimdaklir ana yiruogo ta ashiba den tekümzüktemi samar alir parnok 11 tang tashi bushidat, ta shisem.

West Sumatra province nung ki 37,000 dak tema metsüngogo, ta Muhamadi ashi. Ki asem tzümetüsüng agi apongerogo aser ki 666 raksao.

West Sumatra indang disaster mitigation agency nungi Fajar Sukma-i ashiba agi, tsüngsang kanga majungba ajanga tekümzükba maparen benoka inyaktsü atema tetsüdkaktsü tulu adoker.

Tzümetüsüng agi apu 26, mosque 45 aser school 25 raksatssügo aser irrigation system units ana raksaba ajanga tsüklu hectare 113 metsüngogo aser

süngtonglitong balala tsünüa aliba ali 300sq meter metsüngogo, ta agency-i ashi. Indonesia nung tzünglu kanga sashia aruba ajanga mapangshia anentsüh aser asütsü pa shi.

PRESS RELEASE

March 11, 2024

Mr. P. Renthya Jamir-i züluba ocet, "Naga Nunger Lemet Lenden" (vide Tir Yimyim, Tuesday, January 16, 2024, tapak 4, aser tanga local dailies nung atokba), nung pai "ETC Jorhat aser CTC nung azüngtsü seat sen aser senpet yong yoktepa corruption tenzük" ta züluba angatetpeptsü asoshi College anati pa January 29, 2024 CTC nung ajuruteptsü jaok saka pa temang nung timtem aliba agi maruteter ta January 24, 2024 shiti nung langzü. Anungji pa tebilemba aser tangatetta kechi kuli tejanga dena zürur Principal, CTC, aser Principal, ETC shiti ka nung külemi address sur March 07, 2024 tashi nung yokang ta pa nungi meshi.

Pai March 06, 2024 nung shiti ka ajanga yamai langzü ashi, Tang teraka ta asüba oren nung ya nenok college nung tokolak sur amuoka inyakertem aser ni lia nung aliba terepranger tangashir nübü ka dang lir. Anungji teinyakertem item college ana nung kodanga yamala teraka mali asü ta sura ajiang shitakba lir Aji asünung ni anguba angashiba zülubaji tai asütsü.

Anungji, Mr. P. Renthya Jamir-i CTC aser ETC "nung azüngtsü seat sen aser senpet yong yoktepa corruption tenzük" ta zülubaji kuli kecha mali ta ashi nungji iba ken-o yangji tempanger. Tarutsü nung iba ama kuli tejanga maliba zülu agi College ana tenüng menük petlokja mezületsü sangdonger.

(Prof. Rev. Dr. A. Temjen Jamir) (Prof. Rev. Dr. Shimreingam Shimray)
Principal,
Clark Theological College
Aolijen, Mokochung

Principal,
Eastern Theological College
Jorhat, Assam

Al-Qaeda in Arabian Peninsula lenir Khalid Batarfi süogo



Sana'a, Metsüremi/March 11 (Agencies):

Al-Qaeda in the Arabian Peninsula (AQAP) ajanga par lenir Khalid Batarfi

asüba aser pa melener ka shimba sangdongogo, ta alima tesem ajunga nung telungpur telok balala tesendaktep asadangba itdangiter telok kati ashi.

SITE Intelligence Group ajanga Deobar aonung ashiba agi, AQAP ajanga sangdong agütsüba nung Batarfi kechi ajanga asüar mashi. Saad bin Atef al-Awlaki ya lenir tasenba asütsü ta shia lir.

"Pa süngjema pa indang sempet bushia alidang Tsüngremi pa tanüla agiogo aser pa akang-akanga nokdak, linük balala nun glia senzü tepuokdak ayu aser jihad rara," ta AQAP züngsem tejen kati Batarfi indang video ka nung ashi.

Video nung Batarfi ya sü temesüng aser al-Qaeda indang nisang agi aleper aliba video nung sayu.

Batarfi ya Saudi Arabia nung aso aser pa arishi küm 40 shi liasü südi ta amanger aser 2020 küm tetenzüken US tir inyaka alisang Donald Trump-i Yemen nung kiralongrak dak drone amshia amakdang Qassim al-Rimi tepsetba sülen AQAP lenir asütsü pa shi.

2015 küm AQAP teloki

Yemen nung rongnendak Mukalla yimti agiba mapang tepuokdak yua aliba AQAP züngsem 150 chiokba nung Batarfi ya dena liasü.

SITE ajanga ashiba agi lenir tasenba al-Awlaki ya February 2023 nung video ka sayaba nung tesüsa angu, kong pai Yemen kübok Abyan aser Shabwa province tem nung aliba Sunni tribesmen dang United Arab Emirates aser separatists Southern Transitional Council ajanga AQAP den raraba nung yariteptsü ajungshiba magizüksü ayongzüka liasü.

Al-Awlaki tepsettsü atema US-i senpet sen million \$6 agütsüba nangzüka liasü aser pai yimjak nung United States aser tembar linüktem amaktsü ayongzük ta ashi.

Taoba tir Ali Abdullah Saleh sülen anidakba sepaitem den tesendaktep aliba Houthi teloki 2014 küm temenlen linük yimtiba Sana'a densema tesem timba rakzüka Yemen nung rara tenzük. Linük balalai mulunga aliba Tir Abd-Rabbu Mansour Hadi indang sorkar tanaben amenokdaktsütsü mechii Saudi-UAE nati aniba coalition-i shilem agiba sülen March 2015 nung rara tesashiba akum.

Sorkar yariba telok aser Houthi nunger tsüngta raraba nung Yemen nung aliba AQAP aser danga telungpur telok temi tajangzük agitsü meranga liasü.

Nisung aikati iba telok ya tashi ajema kumogo ta ashir, saka Osama bin Laden tepsetba sülen AQAP ya al-Qaeda indang kongsang tamajungtiba aser tang tashi lir ta US-i ashir.

AQAP ya tajemba kumaka Yemen nung kiralongrak telok teyakyakba iba telok ya lir aser region nung aser alema oa parnoki operations agitetsü tashi lir, ta tawa United Nations ajanga shia liasü.

27buba Zeliang Wrestling Championship ayongzüka asayaogo



Dimapur, Metsüremi/March 11 (TYO): Zeliang Wrestling Association-i ayongzüka 27buba Zeliang Wrestling Championship, March 9 nü GHSS Ground, Jalukie Town, Peren nung asayaogo.

Taküm iba asayamung ya Mpai yimtsüng nungi Nlumrai-i koka liasü. Asayamung akokba sülen Nlumrai nem senpet sen 80,000, tanabuba

Peinachi nem senpet sen 50,000 aser tasembuba Suiriepeu aser pezübuba Ispsi na nem senpet sen 30,000 aser 20,000 agüja liasü. Quarter final tonga asayaba asayar shia nem senpet sen 5,000 agüja liasü.

Sentong nung alakteta jaoker ama shilem agiba mapang Advisor, Urban Development & Municipal Affairs, Zhaleo Rio (IAS

Retd.)-i ashiba agi, Naga wrestling ya Naga nunger sobaliba asaya rongnung tejentiba ka lir aser taoba mapangbo mangattep aliba bentettsü atema Angami, Chakhesang aser Zeliang nungertemi iba ya asaya liasü. Paisa, iba asaya ajungkettsü aser Naga nunger tanga kintema shilem agitsü ajungshitsü kin asem khuret lir ta ashi.

Tetushi tejaoker Iherie Ndang (Sr. SP. Retd.) shiba NDPP (CEB) Tatong Tir lir, pai Zeliang Wrestling koda tejakdangi bener aotsü iba indang lemsatepa liasü. Paisa, lanur asayartem dang takok angutsü atema peisasa aziöksüji kanga tongtibang ta ashi.

Asayamung lapokba sentong ya Advisor ZWA, Associate Pastor, JTLBC, Ihusing-i agüja liasü.

agi aser alakteta jaokeri ZWA atsüketja liasü. Sentong nungsa ZWA Tir, Ada Nsanglung-i Tir o jembia liasü.

Maneni ZWA Advisor, Namcaulakpe-i achaayanga tzükong pezü nungi asayar 45 tenangzüktepba agi aser General Secy. ZWA, Dileugi-i tepela o jembia liasü. Takokertem nem senpet ya Associate Pastor, JTLBC, Ihusing-i agüja liasü.

Indian Wells Open: Sinner, Alcaraz round pezübubai iogo

Metsüremi/March 11, 2024

(Agencies): Tang asaya aliba ATP-WTA Indian Wells Masters nung Jannik Sinner aser Carlos Alcaraz nati Deobarnü kanga junga asaya pei tata asaya kokogo.

Deobarnü tasembuba round asaya nung Australian Open champion Sinner-i Jan-Lennard Struff 6-3, 6-4 agi koka liasü.

Kasa mapang nung Wimbledon champion Alcaraz, shibai taoba küm iba asayamung koker lir, paia 6-2, 6-3 agi Canada nunger asayar Felix Auger-Aliassime ayong ayonga kokogo.

World No. 2 Spain nunger asayar yagi Aliassime nem

asaya nung kecha maongka magütsü aser asaya ayong ayonga koka round pezübuba tongtetogo. Pai iba asayamung nung asaya tibuba atonga kokogo.

Kasa mapang nung Sinner-ia kanga junga asaya aser November ita Davis Cup nung Italy team nungi asayaba mapang takok anguba sülen pai asaya 17 tashi atonga

takok ngua asayaogo. Sinner-i winner 27 ngua liasü.

Alcaraz-i mezüngbuba set nung tatembangbuba game pongu atonga akok aser

Auger-Aliassime koker liasü. Tebur kija asaya nungsa Australia nunger asayar Alex de Minaur-i Alexander Bublik amokbanger asaya-a asaya 7-5, 6-0 agi kokogo.

Maneni Greek nunger Stefanos Tsitsipas-i 6-3, 6-3 agi Frances Tiafoe kokogo, shiba taoba küm quarters tonga asaya liasü.

Tetsür kija asaya nung Iga Swiatek-i, Czech tsür Czech Linda Noskova 6-4, 6-0 agi koka January ita tamakok anguba mang yangogo.

Top seed asayar Swiatek ya hopta ishika tejakdang Australian Open tasembuba break süa asaya tenzük aser asaya koka liasü. Pai 2023 round nung Noskova-i

küm quarter-finals nunga

tsükdakja liasü.

India nunger tennis asayar Sumit Nagal-i support staff atema senotsü teyari densema international tetoktepba ana nung shilem agitsü atema mepeshiba MOC-i agizükogo.

"Senden nung ano badminton asayar Chirag Shetty aser Satwiksairaj Rankireddy na atema video analyst hire asütsü senotsü teyari meshiba agizükogo, weightlifter Jeremy Lalrinnunga indang physiotherapist contract atsülangtsütsü aser track athlete Amoj Jacob equipment alitsü atema senotsü teyari meshiba agütsütsü atema temelaba agütsüogo.

Kasa mapang nung judoka Asmita Dey aser shooter Arjun Singh Cheema nati senotsü teyari meshiba agütsütsü atema temelaba agütsüogo.

"MOC-i judoka Asmita

Dey, Grand Prix, Austria nung kübok tayimtsü, visa, shilem agitsü atema senotsü tanendak, chiyongtsü, training teyari meshiba aser shooter

Khelo India construction project balala virtually lapoktsüogo

Dimapur, Metsüremi/March 11 (TYO):

Nagaland nung Khelo India construction project balala March 11 nü Union Minister for Youth Affairs & Sports and Information & Broadcasting Government of India Anurag Singh Thakur-i virtually lapoktsüogo.

Project tem rongnung Multipurpose Hall Viswema, Kohima, Multipurpose Hall Medziphema, Multipurpose Hall Riphyim, Englan, Wokha, Indoor Badminton Hall Yachem EAC Hq. Longleng, Mon Football

Ground nung Synthetic Football Turf densema lir.

Project balala semzüktsüba sentong nung Chief Minister Nagaland, Neiphiu Rio, Advisor, Youth Resources & Sports, S. Keoshu Yimchunger, Advisor, Urban Development and Municipal Affairs, Zhaleo Rio,

Advisor to CM & Chairman IDAN, Abu Metha aser tanga Advisor aser MLA temi shilem agia liasü, koba Kohima nung Chief Minister indang Residential Complex nung agia liasü.

Mohammed Shami T20 World Cup masayatettsü

New Delhi, Metsüremi/March 11 (Agencies):

India nunger pacer Mohammed Shami shiba tetsüng teloktepba nung shilem agitsü atema senotsü teyari meshiba agizükogo," ta kasa sangdong ajanga metedaktsü.

India nunger tennis asayar Sumit Nagal-i support staff atema senotsü teyari densema international tetoktepba ana

nung shilem agitsü atema mepeshiba MOC-i agizükogo.

"Senden nung ano badminton asayar Chirag Shetty aser Satwiksairaj Rankireddy na atema video analyst hire asütsü senotsü teyari meshiba agizükogo, weightlifter Jeremy Lalrinnunga indang physiotherapist contract atsülangtsütsü aser track athlete Amoj Jacob equipment alitsü atema senotsü teyari meshiba agütsütsü telemtetba agiogo," ta kasa sangdong ajanga metedaktsü.

"Shami surgery agiogo aser pa India-i meyipa aruogo. Shami, Bangladesh den asayatsü aliba asayamung nungiang asayatettsü. KL Rahul-a injection ka nüngdaka liasü aser pa NCA nung rehab tenzükogo," ta Jay Shah-i ashi.

Shami tatemsia India tenüng nungi ODI World Cup nung asayaogo, kong pai kanga junga asaya liasü.

India aser Bangladesh na September ita India nung Test ana aser T20I asem asayatsü.

Kasa mapang nung KL Rahul-a yiruba ajanga England den tatembangbuba Test pezü nung shilem magiteti liasü. Pa London nung temang anepaluba sülen IPL nungbo Lucknow Super Giants nungi asayatsü imlar.

BILEMDANGANG

"Pei akaba agi temulung süa lira teti pela alitsü."

Mirabai Paris nung training agitsü temelaba agütsüogo

Metsüremi/March 11, 2024

(Agencies): Taoba mapang world champion weightlifter Mirabai Chanu-i, Olympic Games matong tsüngda Paris nung oa training agitsü benokba sorkari Hombarnü temelaba agütsüogo.

Tokyo Olympics silver medallist ya Paris nung La Ferte-Milon nung oa training agiba ajanga iba yimti tsüngsangmopung den yimya süba akümtsü, ta Sports Ministry, Mission Olympic Cell sangdong ka ajanga metedaktsü.

Arishi küm 29 tain Chanu, shiba 49kg category nung tokteper, la coach ana aser physiotherapist kati meiner aotsü.

Sorkari Target Olympic Podium Scheme (TOPS) Dey, Grand Prix, Austria nung kübok tayimtsü, visa, shilem agitsü atema senotsü tanendak, chiyongtsü, training

local transport aser medical insurance atema taa ajak agütsütsü.

Mission Olympic Cell-isa, equestrian exponent Anush Agarwalla, asayamung ti nung tokteptsü aser pa indang kor atema osettsüt balala alitsü atema senotsü teyari agütsütsü.

"TOPS-i pa aser coach tanendak, entry fees, kor ana mesüba taa, coach taa aser kor anepaluba taa densema teyari balala agütsütsü," ta ketedangsüremi metedaktsü.

Kasa mapang nung judoka Asmita Dey aser shooter Arjun Singh Cheema nati senotsü teyari meshiba agütsütsü atema temelaba agütsüogo.

"MOC-i judoka Asmita Dey, Grand Prix, Austria nung kübok tayimtsü, visa, shilem agitsü atema senotsü tanendak, chiyongtsü, training

Arjun Singh Cheema-i ISAS Dortmund tetoktepba nung shilem agitsü atema senotsü teyari meshiba agizükogo," ta kasa sangdong ajanga metedaktsü.

India nunger tennis asayar Sumit Nagal-i support staff atema senotsü teyari densema international tetoktepba ana

nung shilem agitsü atema mepeshiba MOC-i agizükogo.

"Senden nung ano badminton asayar Chirag Shetty aser Satwiksairaj Rankireddy na atema video analyst hire asütsü senotsü teyari meshiba agizükogo, weightlifter Jeremy Lalrinnunga indang physiotherapist contract atsülangtsütsü aser track athlete Amoj Jacob equipment alitsü atema senotsü teyari meshiba agütsütsü telemtetba agiogo," ta kasa sangdong ajanga metedaktsü.